



SAOPĆENJE ZA JAVNOST

Određen pritvor provalniku Opljačkao zlataru u centru grada

(Brčko, 28.5.2024. godine)

Postupajući po prijedlogu Tužilaštva Brčko distrikta BiH, Osnovni sud odredio je jednomjesečni pritvor M. S. (39)*, osumnjičenom da je prije nekoliko dana u Brčkom počinio seriju teških krađa. Osumnjičenom za provalnu krađu u zlataru *Đokić Filigran*, kao i za veći broj krađa na štetu građana, pritvor je određen zbog opasnosti da bi mogao ponoviti krivično djelo.

Tužilaštvo i Policija Brčko distrikta BiH intenzivno sprovode istragu protiv M. S. zbog sumnje da je 22. maja oko 02,25 sati, u ulici Bulevar mira, došao do zlatare *Đokić Filigran*, a zatim čekićem razbio staklo na izlogu, nakon čega je iz unutrašnjosti objekta oduzeo veću količinu vrijednog zlatnog nakita. Usto, sumnja se da je dva dana kasnije u ulici Stari rasadnik iz dvorišta S. V. sa stola ispred kuće oduzeo njegov mobilni telefon. Kako se navodi u naredbi za sprovođenje istrage on je, nekoliko sati poslije, u ulici Mostarska, ušao i u kuću vlasništvo B. Š, odakle je iskoristivši nepažnju ukućana oduzeo tablet, telefon i ručni sat. Seriju krađa počinjenih s ciljem sticanja protivpravne imovinske koristi osumnjičeni je okončao 25. maja, kada je u ulici Braće Kobića, dok je M.O. sipao vodu s javne česme, s njegovog bicikla oduzeo torbicu u kojoj se nalazila lična karta, čekovna kartica, novac i mobilni telefon oštećenog.

M.S. je uhapšen 25.maja u večernjim časovima, a nakon zadržavanja i kriminalističke obrade u Policiji, sproveden je u prostorije Tužilaštva. Kao što je to Policija prethodno učinila, i Tužilaštvo je osumnjičenog zadržalo tokom 24 sata, ispitavši ga za to vrijeme u svojstvu osumnjičenog, nakon čega je podnijelo prijedlog sudu da mu odredi pritvor. Prijedlog za određivanje pritvora obrazložen je postojanjem opasnosti da bi osumnjičeni boravkom na slobodi mogao ponoviti krivično djelo za koje se može izreći kazna zatvora tri godine ili teža kazna. Prihvativši tužilački prijedlog u cijelosti, Osnovni sud Brčko distrikta odredio je M. S. pritvor u trajanju od jednog mjeseca, a koji počinje teći od momenta njegovog hapšenja. U međuvremenu, Tužilaštvo i Policija neodložno nastavljaju istragu usmjerenu na dokazivanje krivičnog djela teške krađe (*iz člana 281 stav 1 Krivičnog zakona Brčko distrikta BiH*) pozivajući građane da prijave svaki sličan slučaj.

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

GLAVNI TUŽILAC

ZEKERIJA MUJKANOVIĆ